

## **Kautusang Tagapagpaganap para Ipagpatuloy ang Komisyon sa Cybersecurity ng Illinois**

**SAPAGKAT**, kinikilala ng Estado ng Illinois na ang Information Technology ay mahalaga sa seguridad ng bansa at ng estado, sa ekonomiya, at sa pampublikong kalusugan at kaligtasan; at,

**SAPAGKAT**, ang mga negosyo, pamahalaan, akademya, at mga indibidwal ay lalong umaasa sa mga sistema ng Information Technology, kabilang ang mga sistema ng impormasyon, mga network at kritikal na imprastruktura, para sa mahahalagang serbisyo at pang-araw-araw na pamumuhay; at,

**SAPAGKAT**, inaasahan ng pangkalahatang publiko, gayundin ng publiko at pribadong sektor, na ang mga sistema ng Information Technology ay mananatiling ligtas at matatag sa harap ng pagtaas ng mga banta mula sa mga sopistikadong cyber-attack na nagdudulot ng personal, propesyonal, at pinansiyal na mga panganib sa mga mamamayan ng Estado ng Illinois at nagbabanta sa seguridad at ekonomiya ng ating Estado; at,

**SAPAGKAT**, ang pagpapatibay ng mga sistema ng Information Technology sa Illinois ay lampas sa kakayahan ng alinmang nag-iisang entidad, at nangangailangan ng nagtutulungang publiko-pribadong samahan na naghihikayat sa pagkakaisa ng pagsisikap;

**SAPAGKAT**, upang maprotektahan ang seguridad at ekonomiya ng Estado, nararapat at kinakailangan para sa pamahalaan ng estado na magtatag at manguna ng isang nagtutulungang pagsisikap na kinabibilangan ng pamahalaan, pribadong sektor, militar, pananaliksik, at mga stakeholder ng akademya upang bumuo at magrekomenda ng isang whole-of-state na pamaraan sa pagpapahusay ng cybersecurity ng Illinois;

**SAPAGKAT**, bilang pagkilala sa mga nabanggit, noong Marso 25, 2022, ako ay naglabas ng Kautusang Tagapagpaganap 2022-08 para itatag ang Komisyon sa Cybersecurity ng Illinois (“Komisyon”);

**SAPAGKAT**, mula nang ilabas ang Kautusang Tagapagpaganap 2022-08 at ang pagtalaga sa Komisyon ng Mga Miyembro na Bumuboto at Mga Miyembro na Hindi Bumuboto, ang Komisyon ay nagpupulong at masigasig na nagtatrabaho para maisakatuparan ang mga layunin ng Kautusang Tagapagpaganap 2022-08, ngunit ang naturang mga miyembro ay nagpahayag sa Tanggapan ng Gobernador na sila ay nangangailangan ng karagdagang panahon upang makumpleto ang kanilang trabaho at maihanda ang ulat ng Komisyon; at,

**SAPAGKAT**, dahil sa kahalagahan ng napakaraming isyu na nauugnay sa cybersecurity sa Illinois at ang pangangailangan para sa masusing pagsasaalang-alang sa mga isyung ito ng maraming stakeholder sa pamamagitan ng nagtutulungang publiko-pribadong samahan, nakita kong nakabubuting palawigin ang deadline para sa pagsusumite ng ulat ng Komisyon sa Gobernador ng anim na buwan;

**SAMAKATWID**, ako, si JB Pritzker, Gobernador ng Illinois, sa pamamagitan ng ehekutibong awtoridad na ipinagkaloob sa akin ng Artikulo V ng Saligang Batas ng Estado ng Illinois, iniuutos ko ang mga sumusunod:

### **I. Pagpapatuloy ng Komisyon sa Cybersecurity ng Illinois**

- A. Sa pamamagitan nito, ang termino ng Komisyon sa Cybersecurity ng Illinois ay pinalawig ng anim na buwan, hanggang Hunyo 30, 2023. Isasakatuparan ng Komisyon ang mga tungkulin nito alinsunod sa mga tuntunin ng Kautusang Tagapagpaganap na ito.

- B. Ang Komisyon ay bubuuin ng Mga Miyembro na Bumuboto, Hindi Bumuboto at Tagapagpayo gaya ng itinakda sa Kautusang Tagapagpaganap 2022-08, at ang mga itinalagang Miyembro na Bumuboto at Miyembro na Hindi Bumuboto ay muling itatalaga ng Gobernador.
- C. Tulad ng inilaan sa Kautusang Tagapagpaganap 2022-08, ang Komisyon ay maaari ring magsama ng Mga Miyembro na Hindi Bumuboto, gaya ng pinili ng may-katuturang ahensya ng pederal na may pahintulot at pag-apruba ng nasabing ahensya:
- a. Isang eksperto sa cybersecurity mula sa Chicago o Springfield field office ng Federal Bureau of Investigation.
  - b. Dalawang eksperto sa cybersecurity mula sa Department of Homeland Security ng Estados Unidos, tulad ng mga sumusunod:
    - i. Isang cybersecurity advisor mula sa Region 5 Office of the Cybersecurity and Infrastructure Security Agency; at
    - ii. Isang eksperto sa cybersecurity mula sa Chicago field office ng United States Secret Service.
- D. Ang Komisyon ay dapat magsama ng isang kinatawan ng Statewide Terrorism and Intelligence Center (STIC) bilang isang Miyembrong Tagapagpayo, na itinalaga ng Direktor ng Illinois State Police. Ang Komisyon ay maaari ring magtalaga ng iba pang mga Miyembrong Tagapagpayo na kumakatawan sa mga interes ng parehong pampubliko at pribadong sektor. Ang iba pang mga Miyembrong Tagapagpayo na ito ay pipiliin at aaprubahan ng mayorya ng Mga Miyembro ng Komisyon na Bumuboto. Layunin ng mga Miyembrong Tagapagpayo na suportahan ang pagpapasiya ng Komisyon sa pamamagitan ng pagbibigay ng kadalubhasaan at espesyalisadong pananaw sa mga paksang tinatalakay.
- E. Ang Homeland Security Advisor ng Gobernador, o taong itinalaga, ay magpapatuloy na maglilingkod bilang chairperson ng Komisyon.
- F. Ang Komisyon ay magpapatuloy sa pagbuo at pagrekomenda ng plano sa pagpapatupad para sa pagsasakatuparan ng mga sumusunod na layunin:
- a. Pagbuo at pagpapahusay ng cyber awareness at pagsasanay para sa mga entidad ng kritikal na imprastruktura sa pribadong sektor, kabilang ang pagtuturo sa mga stakeholder ng mga paraan upang maiwasan ang mga pag-atake sa cybersecurity at protektahan ang personal na impormasyon; at pagsasagawa, pagsuporta, at pagdalo sa mga pagsasanay sa cybersecurity upang mapabuti ang mga teknikal na kakayahan;
  - b. Pagbuo ng mga kasanayan, proseso at pangkalahatang pagpapalano na kinakailangan upang maprotektahan ang mahahalagang impormasyon, rekurso, at serbisyo, kabilang ang pagtukoy at pagpigil sa mga cyber-attack upang mabawasan ang masamang epekto; pagpapabuti at pagpapalawak ng mga kakayahan sa pagtugon sa insidente ng seguridad sa buong estado; at pagtataguyod at pangangasiwa ng pagsasanay sa iba't ibang sektor at komunidad at mga senaryo ng pag-eensayo para sa mga kasamahan sa kritikal na imprastruktura sa pribadong sektor upang patibayin ang mga kritikal na sistema na nagsisilbi sa publiko;
  - c. Ganap na pagpapaunlad ng cyber competencies sa pamamagitan ng paggamit ng mga pinakamahuhusay na kasanayan upang matulungan ang mga organisasyon ng kritikal na imprastruktura sa pribadong sektor na gumawa ng

mga risk-based na pagpapasiya para sa pagpapabuti ng cybersecurity, kabilang ang pagsulong ng risk-based na pamamaraan sa cybersecurity; pagtatatag ng mga panrehiyong cyber response team sa kritikal na imprastruktura; at pagbuo at pagpapalaganap ng pinakamahuhusay na kasanayan at kasangkapan upang isulong ang cyber maturity; at

- d. Paglikha at pagpapalawak ng mga samahan upang magsulong ng patuloy na pag-aaral at pagbabahagi ng impormasyon upang matiyak ang kaligtasan at katatagan ng mga digital na imprastruktura, kabilang ang pagbuo at pangangalaga ng mga pakikipagtulungan sa mga sektor ng kritikal na imprastruktura upang matiyak ang katatagan ng mga kritikal na sistema; at pagtukoy, pagsusuri, at pagbabahagi ng impormasyon sa mga banta at kahinaan na nakakaapekto sa estado.
- G. Ang Komisyon ay maaaring magpatibay ng isang charter, na naaayon sa mga probisyon ng Kautusang Tagapagpaganap na ito at sa naaangkop na batas, na nagtatakda kung paano pangasiwaan ng Komisyon ang sarili nito at isagawa ang mga responsibilidad na ibinigay sa Kautusang Tagapagpaganap na ito. Maaaring tukuyin ng charter ang mga naturang bagay bilang mga pagpupulong ng Komisyon, paglikha ng mga komite at grupong nagtatrabaho, at iba pang mga bagay na itinuturing ng Komisyon na nararapat.
- H. Ang Illinois Emergency Management Agency ay magpapatuloy sa pagbibigay ng administratibong suporta para sa, at panatilihin ang mga rekord ng, Komisyon.

## **II. Ulat sa Gobernador**

Ang chairperson ng Komisyon ay dapat magsumite ng ulat sa Gobernador sa Hunyo 30, 2023. Dapat idetalye ng ulat ang mga aktibidad, mga nagawa at rekomendasyon ng Komisyon. Sa pagsumite ng ulat, ang Komisyon ay bubuwagin.

## **III. Etikal at Iba Pang Mga Kinakailangan**

Ang Komisyon ay sasailalim sa mga probisyon ng naaangkop na batas, kasama nang walang limitasyon ang Illinois Open Meetings Act, 5 ILCS 120/, at ang Illinois Freedom of Information Act, 5 ILCS 140/. Ang mga miyembro ng Komisyon ay sasailalim sa mga probisyon ng naaangkop na batas, kasama nang walang limitasyon ang Illinois State Officials and Employees Ethics Act, 5 ILCS 430/.

## **IV. Pangligtas na Sugnay**

Wala sa Kautusang Tagapagpaganap na ito ang maaaring ipakahulugan upang salungatin ang anumang pederal at pang-Estadong batas o regulasyon. Wala sa Kautusang Tagapagpaganap na ito ang makakaapekto o makakapagpabago sa mga umiiral na kapangyarihang ayon sa batas ng alinmang ahensya ng Estado o maipakahulugan bilang muling pagtatalaga o muling pagsasaayos ng anumang ahensya ng Estado.

## **V. Mga Naunang Kautusang Tagapagpaganap**

Ang Kautusang Tagapagpaganap na ito ay humahalili sa anumang salungat na probisyon ng anumang iba pang naunang Kautusang Tagapagpaganap, kabilang ngunit hindi limitado sa Kautusang Tagapagpaganap 2022-08.

## **VI. Sugnay na Naghihiwalay**

Kung ang alinmang bahagi ng Kautusang Tagapagpaganap na ito ay napatunayang hindi wasto ng isang korte na may karampatang hurisdiksyon, ang mga natitirang probisyon ay mananatiling

ganap na may bisa at epekto. Ang mga probisyon ng Kautusang Tagapagpaganap na ito ay maaaring ihiwalay.

## **VII. Petsa ng Pagkabisa**

Ang Kautusang Tagapagpaganap na ito ay magkakabisa kaagad sa oras na maihain ito sa Kalihim ng Estado.

Inisyu ng Gobernador Disyembre 20, 2022  
Inihain sa Kalihim ng Estado Disyembre 20, 2022

---

**JB Pritzker, Gobernador**